

四庫全書

集部

欽定四庫全書

明詩綜卷五十六

翰林院檢討朱彝尊編

羅萬化一首

萬化字一甫會稽人隆慶戊辰賜進士第一歷

官禮部尚書贈太子少保謚文懿有世澤編

靜志居詩話唐宋科目繁多至明而始終所重  
惟甲第志科名盛事者首述吉水莆陽而於越  
山陰自諸文懿大綬而後榜五發邑人居其三  
焉傳聞三公俱同席硯之友不可謂非盛事已

擬此日不再得

落景無返輪奔星少回光綠髮不戀人轉眼化為蒼所  
以志士心努力及方剛恒恐歲遲暮蘭蕙不得芳膏火  
還自煎山木亦自戕我謀一以乖終身失其臧大道本  
希聲至人貴含章豈其魚目珍而登君子堂登高豈無  
梯濟深豈無航愚者貴速至聖人寶其常虛牖展素書  
古人未云亡無為守躊躇徒貽過時傷

趙志皋

二首

志皋字汝邁蘭谿人隆慶戊辰賜進士第三歷  
官建極殿大學士贈太傅謚文懿有澈陽詩集

早發錢塘

曉霧兼天白秋風一葦輕湖吞漁浦闊沙湧固陵平隔  
座吳山遠揚帆越嶠迎蒼茫思無限天外忽鐘聲

贈太僕何石川

丈人三徑傍城隈不厭鄰翁日日来雙鶴竹間迎客舞  
一尊池上為誰開采芝合共商山老作賦仍多洛社才

自笑登樓倦懷土暮天回首重徘徊

王家屏 六首

家屏字忠伯大同山陰人隆慶戊辰進士歷官  
禮部尚書文淵閣大學士贈少保謚文端有復

宿山房集

詩話宋制祖宗翰墨儲藏於玉堂之署觀陳騤  
中興館閣前後錄道君墨跡俱存此康譽之得  
題年年花鳥無窮恨盡在蒼梧夕照中之句也  
迨元而奎章宣文之閣舊典不改明則藏之大  
內詞臣末由覩矣萬歷九年帝御文華殿宣召  
入直史臣五人文端居首其餘修撰則沈公懋

孝張公元怵編修則劉公元震鄧公以讚也既  
進見示以景陵御筆玄兔圖園以淡墨作滿月  
胎上有桂枝垂枝下藉輦草兔居其中並臻妙  
境諭諸臣題詩於軸并得用私印識之閱三日  
詩成進御自首輔張文忠外凡三十有五人當  
日諷諫優游不事促迫綵花銀葉賜予便蕃自  
永宣以來詞林盛事過此罕矣長陵四馬詩世  
傳為江陵作今從館課集本正之文端立朝侃  
侃不阿因一諫官力爭去位風節固不  
可及詩亦雍容和雅不失正始之音

### 恭題文皇帝四駿圖

龍駒 鄭村壩大戰胸著一箭都指揮丑丑拔  
箭

天馬徠翼飛龍蹄削玉耳垂筒碧月懸雙頰明星貫兩  
瞳文皇將士盡罷虎復有龍駒助神武流矢當胸戰不  
休汗溝血點桃花雨壩上摧鋒策一功策勲何必減元  
戎君不見虎士標題麟閣裏龍駒亦入畫圖中

赤兔 白溝河大戰胸著一箭都指揮亞失帖  
木拔箭

雷鉤鉤北軍來赤兔走黃雲開攬身超夾澗策足絕浮  
埃白溝原頭振輦鼓貫陣穿營猛如虎穆王八駿詎為

奇昭陵六馬應難數百戰間關未解鞍  
箭瘢還向畫圖看只今四海昇平日誰識當年締造難

棗騮 小河大戰著兩箭胸一箭後右曲池一  
箭安順侯脫火赤拔箭

紫騮馬金駱月朝刷燕晡秣越俶儻精權奇超驤走滅  
沒當年萬馬盡騰空就中紫騮尤最雄戰罷不知身著  
箭飛來祇覺足生風北風獵獵吹原野長河水漸血流  
渚誰言百萬倒戈中猶有彎弧射鉤者



黃馬 靈璧縣大戰後右曲池著一箭指揮雞

兒拔箭

軒后興應龍翔駕天駟乘飛黃迴頭看紫驚顧影失超  
光君王神武古來少萬里煙塵一劒掃馬蹄蹴處山為  
摧何論陳暉與平保揚鞭渡淮淮水清金陵父老壺漿  
迎從此華陽休駿足山河重整泰階平

初入翰林自述

生平未知學世路方多歧古人已不作古道猶可追願

言對青簡澹慮澄玄思宇宙皆吾事一念安可欺譬彼  
機中素皎潔防其緇譬彼山下石孤貞堅自持文章乃  
末技富貴非吾期出入感榮邁朝夕承師資遠心在霄  
漢努力酬明時

朱賡一首

賡字少欽紹興山陰人隆慶戊辰進士歷官少  
保兼太子太保吏部尚書文華殿大學士贈太  
保加贈太傅謚文懿有集

薊門行

曠騎窺青海天兵出薊門  
白草邊城暗黃沙塞月昏悲  
笳風外哽咽不堪聞

于慎行

六首

慎行字可遠更字無垢東阿人隆慶戊辰進士  
選庶吉士授編修歷修撰侍講左諭德侍讀學  
士陞禮部侍郎改吏部拜禮部尚書入直東閣  
卒贈太子太保謚文定有穀城山房集

詩話東阿格律和平當正聲微茫之  
時能為是調即以詩高遜亦堪作相

晉陽男子行

隆慶己巳太原丈夫  
化為女子歌以識之

太原有男子壯烈世所無身長九尺餘白皙好眉鬚自  
負良家子募作材官徒腰中轆轤劍橫擊當路衢并州  
惡少年見之伏且趨一朝覽青鏡侘傺空堂隅三日不  
出戶忽然見彼姝綽綽芙蓉顏盈盈玉雪膚蛾眉娟且  
長高髻墮馬梳脫我金鎖甲繫我繡羅襦掛我白貂帽  
珥我明月珠委心懷嫵婉不惜健兒軀昔為雲中鵠今

為水上鳬昔者一何厲常關十石弧今者何柔曼巧笑  
傾城都仰視浮雲馳變化不須臾茫茫窺元運玄黃無  
乃渝世人但云好不必稱丈夫

過雨

五月不知暑虛空颯似秋殘虹挂溪水片雨過城樓遠  
樹斜陽駐深山夕翠流晚涼思枕簟絕愛北窗幽

秦淮

秋月秦淮岸江聲轉畫橋市樓臨綺陌商女駐蘭橈雲

裏青絲騎花間碧玉簫不知桃葉水流恨幾時消

送朱養淳太史冊封周藩

蓬萊闕下五雲飛桐葉封函出帝畿漢苑花香隨便節  
河橋柳色上征衣天臨玉署恩偏渥星近銀河夜更輝  
試向天津橋上望銅街無處不芳菲

送張洪陽學士請告南旋

長河南下水曾波吳楚青山枕上過行到潯陽江口望  
應憐秋色故園多

少年行

錦帶珠袍綠臂韉相逢盡說富平侯  
南山夜獵春城晚  
繫馬新豐舊酒樓

陳于陞

一首

于陞字元忠南充人隆慶戊辰進士  
歷官太子太保禮部尚書文淵閣大學士  
贈少保謚文憲  
有萬卷樓橐

宣廟御筆馬

寶繪傳神駿權奇尺素收蹄攢雙碧玉文散五花虬赤  
汗當沾臆黃金為絡頭天閑今萬匹何必按圖求

張位一首

位字名誠南昌人隆慶戊辰進士改庶吉士授  
編修遷司業以糾江陵奪情謫徐州同知後累  
官少保兼太子太保吏部尚書武英殿大學士  
謚文端有叢桂山房彙稟

詩話文端以持正忤江陵詩頗有憂危之語其  
詠射鵲云方寸能幾何當此亂鏃投有感其言



之也既罷相於東湖杏花村建閒雲樓吟眺自  
娛晚探青原之勝汎舟螺川野服簞車登覽竟  
日老僧不識為宰相題詩懷鄒魯瞻門人胡  
廷宴守吉安從寺壁見詩始知之是亦佳話

七夕

塞月催砧急天風襲袂深星河良夜色牛女隔年心莎  
逕流螢度花陰促織吟平生江海意荏苒二毛侵

裴應章 一首

應章字元闡清流人隆慶戊辰進士歷官南京  
吏部尚書贈太子少保謚恭靖有懶雲集

豐嶺即事

倚仗危峰上煙霞嶂幾重逶迤盤古道絕勝引仙蹤露  
滴晴天雨雲低半嶺松蓬壺何處是天際一聲鐘

范謙一首

謙字含虛豐城人隆慶戊辰進士歷官禮部尚  
書贈太子少保謚文恪有雙柏堂集

初入翰林自述

聖人啓元運應龍協昌期萬物快先覩而我逢茲時抱

策獻天門鴻漸修羽儀木天肆宏敞玉軸陳參差石渠  
發中秘虎觀探幽奇淵源接師友得失隨箴規分陰期  
共兢古道還力追願言謝紛華兼以息驅馳但令微忠  
效無求虛譽垂庶幾大造化於以酬毫釐坐見乾坤泰  
我亦贊無為

習孔教 一首

孔教字時甫廬陵人隆慶戊辰進士選庶吉士  
歷官南京吏部右侍郎

將進酒

將進酒客莫辭玉交杯金屈卮主人勸客揖且讓客言  
我飲本無量有如法宮置酒監在前史在後此時徑醉  
不及一斗州閭之會六博投壺男女雜坐盱眙歡呼爾  
時醉可兩壺日暮酒闌合尊促席履舄交錯杯盤狼藉  
羅襦襟解微聞鄉澤當此時也能飲一石款戲乎酒極  
則亂樂極則悲萬事盡然高陽之徒安足為書有豐刑  
亦有酒誥舌出禍入君子所悼主人休矣職思其居三

爵不又言毋我渝

田一儁 一首

一儁字德萬大田人隆慶戊辰進士歷官禮部

左侍郎有鍾台遺藁

遲鄭郎不至

幽齋淨朝塵崇館紛晝靄涼葉陰已深疎花落猶在美  
人來不來搔首空相待渺渺望河干青山出雲外

韓世能 一首

世能字存良長洲人隆慶戊辰進士改庶吉士  
除編修歷修撰侍講右諭德陞國子祭酒南京  
禮部侍郎召入兼侍讀學士有雲東草

送友人南還

垂柳千條拂御溝上林春色鳳池頭如何張翰多歸興  
不待秋風已倦遊

沈思孝

四首

思孝字純父嘉興人隆慶戊辰進士累官都察

院右都御史兼兵部侍郎贈太子少保有行成  
郊居西征陸沈諸橐溪山堂吾美堂等集

詩話先生封事尤觸江陵之怒杖畢即加錄鑠  
復下獄三日始僉解發戍既抵嶺南巡撫欲殺  
之以媚政府遽以尺符召之行至恩平先生袖  
匕首示縣令曰巡撫必欲殺我我當與俱斃不  
然伏尸軍府中令天下士大夫皆知巡撫所殺  
也縣令密以告巡撫得不死蔡副使文範作壯  
哉行送之其歸也胡元瑞贈詩云豈菟花前千  
里夢枕椰樹下十年人先生頗好賞鑒書畫言  
者遂劾其以千金市王右軍真蹟一卷南箕貝  
錦可以意成也詩入瑯琊四十子之列晚交姚  
吏士葬未免  
間作磬牙語

喻邦相同喻羨長至集怨醉軒

白雲邀上客黃葉繞貧居  
缸面沽來酒槎頭釣得魚  
山川連越絕雞犬數秦餘  
一日千秋意相看老不疎

思家

長卧鳳城隈鄉心日夜催  
小人猶有母明主漫憐才  
木葉千山雨江湖八月雷  
倚閭秋欲盡底事不歸來

清寧兩宮灾臣督諸軍入救  
上使小黃門賜以肴  
四合酥與果稱是中有鳳仙橘  
小紅梨佳甚乃



藿食者所未嘗敬賦此以紀之

春盤分尚食天語遣黃門橘豈維揚貢黎堪大谷論股肱悲未及口腹媿知恩獨荷焦頭賞能無負至尊

出都門

天高落葉繁匹馬上東門固寵寧臣節完名是主恩青雲雙闕迴綠野幾家存滿篋匡時草攜歸覆酒尊

賈三近一首

三近字德修澤縣人隆慶戊辰進士選庶吉士

改授吏科給事中轉戶科都給事中遷太常少卿改督四夷館歷大理左右少卿南北光祿寺卿以右僉都御史撫保定入為大理寺卿轉兵部右侍郎有東掖漫橐

于無垢云石葵歌詩清爽疎宕咳唾立成

### 冬日登嶽

遊目高寒處羣山擁岱宗登封迷漢州徙倚有秦松萬壑煙嵐合諸天紫翠重肩輿明月下上界已聞鐘

### 邵陛一首

陞字世忠餘姚人隆慶戊辰進士改庶吉士歷  
官刑部左侍郎

過拜將臺懷古

千載遺蹤表故臺殘雲縹緲夕陽開三川佳麗興王地  
百戰勲名大將才此日江山空草木當年壁壘半蒿萊  
登臨不盡英雄恨風急寒沙過鴈哀

沈懋孝

一首

懋孝字幼真平湖人隆慶戊辰進士改庶吉士

歷南京國子司業謫兩淮鹽運司判官起河南  
巡撫未任有淇林雅詠

詩話晴峰樂府句摹篇倣不脫歷  
下窠曰餘體斐然能於同中見異

### 北固登望

北固樓前一笛風  
碧雲飛護建康宮  
江南二月多芳草  
春在濛濛細雨中

朱孟震

四首

孟震字秉器新淦人隆慶戊辰進士除南京刑

部主事歷郎中出知重慶府陞河南按察副使

累官通政使以右副都御史巡撫山西有郁木

生全集

任少海云使君詩閑毫瀟灑了無塵俗氣陳于韶云秉器才情婉附流調毫

發若孤桐朗玉自有天律張助甫云秉器詩

爾雅深厚緣情達理吳明卿云秉器負用世

才以餘力為詩諸體錯陳意匠所極才亦副

之陳玉叔云秉器詩本於才體氣高妙

詩話秉器津津以詩家自許其在南曹結清溪

社一時名士聲應氣求所緝楮談續談餘談述

先詰之舊聞綜同人之

麗句可謂好事也已

和答正甫

幽意若不愜清歡良未期如何汾水上忽枉故人詩芳  
草王孫路朱華帝子池相思隔年歲河漢正高垂

哭孔汝錫先生墓

殘歲龍蛇逼新阡雉兔過露隨朝槿盡風入暮蟬多坐  
失千鐘酒情傷九辯歌夜臺無白日一慟欲如何

春日金沙寺訪羅孝廉元我

春水金沙是舊遊春風黃鳥況相求馬蹄一逕穿雲入  
花氣千林帶雨浮詞客雄文已蜀檄故人清興剡溪舟

草堂蹤跡今猶昔好為狂夫十日留

謁張桓侯廟

英姿颯爽氣雄哉恍惚晴霄風雨來  
一代君臣元伯仲千秋祠廟倚崔嵬  
乾坤已限三分業熊虎空懷上將才  
正是雲安春月夜杜鵑啼徹不勝哀

龔勉一首

勉字子勤無錫人隆慶戊辰進士除嘉興知縣  
以憂歸補吳橋知縣陞南京刑部主事轉戶部

負外進郎中出知嘉興府遷浙江叅政轉按察

使調山東遷浙江右布政使有尚友堂集

彭子殷云

子勤詩整暢

可方錢劉

### 送王會泉武庫出守永州

仙郎戎政擅才名簡命熊幡向楚城  
車騎舊瞻司馬節  
檐帷新識使君旌  
九疑南接湘江遠  
五嶺東連粵路平  
遙想行春風日好  
瘴煙消盡百花明

蔡文範

十首



文範字伯華瑞州新昌人隆慶戊辰進士歷官  
廣東布政司叅議有縉雲齋橐甘露堂集

詩話青門近

體雄渾絕倫

自瀛德至東昌道中雜詩

聞道張秋決先朝慮獨深為山名戊巳奉使失辛壬地  
控支祈鎖天寒象罔沈誰知神禹跡疏鑿本無心

岳州馮觀察見招

澹澹鋪湘水依依見武陵雲隨天不動川靜水凝冰

魅愁神鼎魚龍怪佛燈夜深清楚徹何異普陀僧

太和宮

疆域連秦塞星辰入楚都英靈天地啓宮闕古今無  
艸諸儒遜玄功萬國趨祠前瞻阜燾曾說贊文謨

送庫部朱陽和備兵甘肅

陰山雪墮紫貂裘使者行邊大漠秋陝右長城班定遠  
胸中武庫杜荊州風吹獵火通甌脫遂奏梅花落隴頭  
哈密至今無敢論知君躍馬看吳鉤

紅心驛值雪

雪色初驕冷萬家那堪風急更迴斜來從朔北還兼雨  
去到江南定結花沙上紫騮嘶不度愁邊青鬚忽先華  
荒村日暮平如練破却寒光數點鴉

遊南岳 二首

縹緲仙臺紫氣浮煙籠玉座儼垂旒地包荆楚標南紀  
江合沅湘向北流牲帛千秋周祀典衣冠五月舜諸侯  
塵緣未斷慚仙骨金簡雲書何處求

赤帝高居小梵天，衆峰羅列擁堦前。秋經絕壁風雷起，

有風雷洞

醉倚雙臺日月懸。

上有望日望月二臺

誰道人騎黃鶴去，我

今寒抱白雲眠。莫言此夕非冲舉，已隔人寰丈九千。

誌載

祝融峰高九

十丈有奇

### 寶應湖

湖闊疑無地，堤長亘若虹。孤舟數點雨，殺却日南風。

### 望白鶴嶺

百里初見近，十里轉見遠。絕頂不分明，白雲隨舒卷。

溪漲發建陽

白日欲沒雲濛濛建陽城外雨澆空溪邊怪石不知數  
一夜走入洪濤中

顧大典

三首

大典字道行吳江人隆慶戊辰進士歷官福建  
提學副使謫禹州知州改開州有清音閣集

得山東觀察報留別省僚

肅肅晨風吹明星帶徂兩平生攜手俱今乃殊風壤大

江一以遠日夕春潮長憶奉南皮游良時清尊賞華篇  
想遺則淵調懷餘響朋僚既雨散世路即塵鞅去去不  
可追臨風徒憤忼

苕溪春日

苕溪春深春欲歸柳絲拂地梨花落客子辭家已三月  
春風初換越羅衣羅衣競試春江曲花外鶯聲斷還續  
春心羈思兩相催愁見天涯春艸綠春艸年年伴客程  
扁舟明日又孤征故園回首春雲隔江上春風空復情

送秦郡倅還楚中

一朝辭簿領千里返湘江  
棄置君何罪離羣我自傷  
春風過夏口秋艸卧衡陽  
為報南來鴈音書好寄將

沈位 三首

位字道立吳江人隆慶戊辰進士改庶吉士授

檢討有柔生集

詩話虹臺詩麗以則惜不  
永齡中秋結語殆成纖也

十二月二十一日獻俘

睿德通中夏天威震北隅遐方歸正朔欵塞獻新俘清  
廟陳宏業彤庭顯秘圖五兵原不戰巨寇已行誅將相  
多酬賞衆區盡大酺小臣叨侍從率武詠神謨

### 中秋

秋光長與翠華連況是中秋更可憐城闕影高雲裏見  
芙蓉露冷沼中妍誰家笛弄江南曲幾處鴻飛塞北天  
此夜清輝應莫負人生能見幾回圓

### 漁陽春望



二月春方半冷風日正長陌頭看柳色忘却在漁陽

張鎰一首

鎰號石渠吉安永豐人隆慶戊辰進士除東莞知縣陞南工部主事歷負外郎中出為湖廣按察僉事轉貴州叅議

寄艾和甫謫戍西寧

荆南偶接故人書為悉闕門近起居萬里獨看營外月孤身誰念釜中魚辭劉徐恕心元苦折檻朱雲願不虛

秦地日聽邊塞曲楚歌相和調何如

喻均 四首

均字邦相新建人隆慶戊辰進士歷官天津兵備副使有山居集

陸中丞移書促入郭有事田間詩以陳情

龐公願負耒陶令甘荷鋤外物既不干誰能逸其軀朝夕課童僕黽勉在田廬心事異昔人蹤跡與之俱咄嗟不逢年高原化為渠穡事良已矣種豆山一隅羣雀苦

交啄持竿為毆除詎意小臧來乃接中丞書要我入城  
郭高義有誰如顧念山中人人生事各有須寧能舍田畝  
忽此升斗儲殷勤謝來意禮數寬樵漁

春暮宿大觀樓簡士功及二三知己

閒居不適意觸事增煩憂振步出西郭登君江上樓滄  
波漲初闊綠樹陰已稠煙雲綴遐岫蘭茝盈芳洲迴覺  
心迹清轉見身世浮徘徊未能去衾枕聊淹留既以自  
怡悅因之報舊遊

送方子及入計

凝霜沾浦樹冉冉歲欲晏君子意如何垂老仍薄宦一  
卧艾子城六見秋花綻月米分故人日食藜與覓高志  
慕翔鸞卑棲託斥鷃發軌謁承明蚤晚流皇盼白首感  
睽離追餞臨寒澗握手慘無言側睇雲間鴈

請告書懷

夙昔浮雲意微官久欲休蹉跎身漸老丘壑願方酬海  
日猶殘暑山風欲度秋盈盈河上水萬里送歸舟

方 沆 二首

沆字子及莆田人隆慶戊辰進士歷官雲南提

學僉事謫寧州知州有猗蘭堂橐

朱秉器云子及詩非大歷

貞元以上語不道 謝山子云  
子及心境高妙有天然之趣

秋汎

山合松楸晚沙寒橘柚秋坐看魚鳥近歷歷鏡中遊

次長沙懷賈太傅

楚雲萬里望京華賈傅南遷路未賒誰料逐臣今更遠

春風三月過長沙

唐文燦

一首

文燦字若素漳州鎮海衛人隆慶戊辰進士除  
行人厯官廣西按察僉事有鑑江亭帚集

大行皇帝輓歌

憶昔河清日流虹叶瑞徵運隨真主轉紀逐盛時蒸七  
世觀新廟千秋奉永陵耿光長照耀史冊紀中興

郭莊

一首

金史卷之二十一  
老五十一  
莊字子莅鞏昌徽州人隆慶戊辰進士改庶吉  
士授山東道御史督學南畿

賦得謁帝承明廬

丈夫重意氣束髮事周遊挾策日坎壈西風吹敝裘一  
朝際風雲謁帝來神州出入承明廬交結盡英流雙闕  
聳雲漢朱旗夾道周翱翔供奉客錦帶佩吳鉤相傳樹  
勲名寧論沈與浮君看黃鵠志不為稻粱謀

帥機一首

機字惟審臨川人隆慶戊辰進士歷官南京禮  
部郎中陞思南知府謫兩浙鹽運司副遷南京  
刑部郎中有膳部集

秋懷

八月金氣深蕭瑟叩虛牝梧楸半離披朱華日就隕風  
急度離鴻氣嚴感飛隼皎月正舒遲義輪漸縮窘砧聲  
動四鄰薄寒侵席筍清景誠足嘉惜此歲道盡況復愴  
松楸欲賦思歸引



鍾庚陽一首

庚陽字長卿秀水人隆慶戊辰進士除太平推  
官入為大理評事遷工部主事歷貢外郎中出  
知鎮江府謫知廣德州終刑部員外有焚餘集  
劉在南直指遷郴州余亦謫守廣德同發潞河投  
贈

繡衣使者下蘭臺愁說雙旌潞水開自是聖恩寬逐客  
却從謫宦見仙才山過衡嶽孤帆轉路入瀟湘鴈影回

余亦南行賦歸去秋風天末幸追陪

唐邦佐

二首

邦佐字惟良蘭谿人隆慶戊辰進士知泰和如  
皋儀真三縣入為刑部主事謫兩淮運司判官  
轉贛州府通判遷知光州有比部集

感興

蟠曲惡木根不植太山岡婀娜孤生竹抽梢淇水旁佳  
人好脩飾被服素羅裳感茲帛鴈會得充君子房絲蘿

引長蔓琴瑟淨高張合懽在令德容色豈足揚

塞下曲

曾隨驃騎度渾河雨雪天山夜負戈莫謂歸家貧到骨  
黃沙白骨不歸多

張元忬 一首

元忬字子蓋紹興山陰人隆慶辛未賜進士第  
一歷官左諭德兼侍讀有不二齋橐

杜輅巖訪吳公度

杜轄巖中人曲江舊同席未折彭澤腰早著東山屐  
栖心老氏書結廬武夷側晴峰萬點青雲溪幾條  
白玄關夾長松丹房架危壁巖頭露可餐巖下芝  
可摘猿鶴時為羣車馬杳難即我本丘壑人聊作  
金門客煙霞夙同好出處偶殊迹諦觀聲利場何  
似神仙宅四十已無聞百年亦瞬息徒然赤松子  
巢居鍊形魄明發出閩嶺題詩訂泉石

鄧以讚 一首

以讚字汝德新建人隆慶辛未賜進士第三  
官吏部右侍郎贈禮部尚書謚文潔有佚橐

思歸

星河雲氣淡  
萸菊露華清  
宦況慵兼病  
鄉愁斷又生  
入秋偏遠夢  
逐日計歸程  
南鴈空中唳  
能禁此夜情

郭子章

二首

子章字相奎泰和人隆慶辛未進士歷官都御  
史巡撫貴州進兵部尚書有閩州留州蜀州浙

艸晉艸楚艸黔艸等集

詩話青螺敬愿外臺而著書不輟  
詩嫌合格者少然勝於輒熟者多

紀夢

西南欒槍明占在川之播何哉井底鼃不知有漢大黔  
中久愉恬崇朝忽摧挫聚黨嘯綦江一倡乃百和城市  
走豸豺平原起堀堞天子赫斯怒命將出右个猥予在  
田間未許支離卧馳驅竹王疆迅速等轉磨夜夢壯繆  
侯車騎儼相過倒屣延之入席分賓主坐論賊無足虞

糝糠易揚簸巢幕暫偷安積薪以待莖及余入八番次第密搜邏衝風籜乍卷利匕粉同挫豈專帷幄謀一一神所佐從此半壁天蠻貊始退悞荆祠敬事侯擊牲進香糯誰為報侯功銘詩我所作

舟中

三春滯水漬魚鳥狎成羣江濁流新雨山晴斂薄雲村春幽澗急岸艸夕陽薰何處城頭角偏令倦客聞

劉克正

一首

克正字懋一從化人隆慶辛未進士改庶吉士  
授檢討

春雪

乍覺輕寒薄太空凍雲舞絮一宵同點成簾幕  
渾成雨飛入園林不待風萬里江山春寂寞  
九重宮闕玉玲瓏仙郎天下聞高調一曲誰能和郢中

郭子直

一首

子直字舜舉崇德人隆慶辛未進士除行人歷



官福建按察副使

采菱曲

采菱復采菱采采日已暮貪看馬上郎迷却花間渡

侯堯封

二首

堯封字欽之蘇州嘉定人隆慶辛未進士授刑部主事改四川道御史歷官福建叅政有鐵菴

遺橐

第一禪林

自是禪栖第一林，萬松迴合白雲深。  
遠看麋鹿不知數，欲問禪居何處尋。  
中天日月遞朝暮，下界山河自古今。  
暫憇便疑塵世隔，幾人曾此一投簪。

劉虞夔 一首

虞夔字直卿，高平人。隆慶辛未進士，改庶吉士。  
歷官太常寺少卿，兼侍讀學士，掌翰林院事。

苦熱行

燕山虛傳千丈雪，昔乃苦寒今苦熱。  
苦寒尚可禦苦熱，

安所逃寒有重裘與室足自庇熱雖袒裼心煩勞炎風  
吹埃沸四野火雲布空日如赭長安袞袞車馬塵驅馳  
道路何為者吾思仙人乃在閭風岑水晶宮闕琪樹林  
安得從之御風吟攬子之袖開我襟念此已足清人心  
吁嗟炎蒸三伏無歲無發狂大叫胡為乎

周光鎬 二首

光鎬字國雍一字耿西朝陽人隆慶辛未進士  
除寧波推官陞南戶部主事改吏部歷郎中出

知順慶府陞四川副使轉叅政遷陝西按察使  
擢僉都御史撫寧夏入為大理寺卿有明農山  
堂景艸

大梁道上

眺望中原路逶迤入大梁風塵馳朔騎節序改青陽衛  
水浮煙黑沙河落日黃愁來看短鋏猶帶薊門霜

秋懷

靈關秋色白榆多九月霜風黑水河天外鴈鴻嗟阻滯

籬邊松菊怨蹉跎南來叩塞無烽燧西去臨洮走橐駝  
此日三秦憂不細禁中親詔出廉頗

吳中行 一首

中行字子道武進人隆慶辛未進士改庶吉士  
授編修以建言廷杖為民尋起用遷右中允歷  
洗馬管司業事進侍讀有復菴集

詩話江陵奪情事在萬歷五年七月迨十月之  
朔彗星見大內火於是既望三日吳公疏上次  
日趙檢討用賢疏上又次日父貢外穆沈主事  
思孝疏上江陵怒不可止而諸公均受杖矣方

杖時鄒進士元標疏復上一時士氣持正若是  
許丈穆以庶子充日講官為吳趙二公餞鵠玉  
杯一銘曰斑斑者何卞生淚英英者何蘭生氣  
追之琢之永成器以贈吳公犀杯一銘曰文羊  
一角其理沈默不惜剖心寧辭碎首黃流在中  
為君子壽以贈趙公玉杯今不見犀者為吾鄉  
何少卿楚音所得  
余嘗飲此作歌

### 賦得露凝仙掌

絳闕秋容靜金莖露氣長夜深方湛湛日出轉瀼瀼共  
喜仙人掌能滄玉女漿願持方聖澤沾灑徧遐荒

### 史鈞一首

鈞字汝和餘姚人隆慶辛未進士改庶吉士授  
編修

春晴

春光二月滿皇州半逐桃花入水流何事王孫歸未得  
東郊芳艸自含愁

丁元復

一首

元復字見心長洲人隆慶辛未進士除知陽信  
縣擢山西道御史歷浙江布政司叅議有片玉

齋存橐

早春過趙凡夫池館

幽栖何所定，選勝得支硎。  
檻底泉鳴玉，天邊石作屏。  
江梅依磴戶，谷鳥浴清泠。  
千丈原頭瀑，宜添一艸亭。

鄭邦福

邦福字洪疇，上饒人。隆慶辛未進士，歷官南京太僕寺卿，有采真遊橐。

牛場坡



俯身牛場坡仰面臘笏嶺白雞

山名

帶雨翔老鴉

闕名

入雲

猛如穿螺竅中復躋蝸角頂行地雖數舍計天不盈頃  
從來汗漫遊觀茲殊絕景那知陟宦階巖嶮極無影

吳中立

二首

中立字公度浦城人隆慶辛未進士授禮部主  
事歸籍起尚寶司丞有吳音

浪吟

楚歌鳳兮鳳孔操麟乎麟空為世所瑞胡不全其真三

山有若木百歲無故人去覓逍遙子清湘采白蘋

舟行白下

江天澹秋色斜日照孤篷  
漁艇沿門繫蒹葭到處通  
鳥飛帆影外人在鏡湖中  
始覺煙波叟浮家趣不窮

薛夢雷

二首

夢雷字汝奮福清人隆慶辛未進士歷官雲南  
按察使有彩雲集

發三山

倦遊萬里欲投閒未斷塵緣更出關七十二程重屈指  
夢魂何處不三山

夜次弋陽

風塵何事只棲棲楚水茫茫去鳥低落日漸看人影盡  
平沙如雪弋陽谿

熊敦朴一首

敦朴字茂初內江人隆慶辛未進士改庶吉士  
歷官貴州布政司叅議有謫居橐

得趙汝師太史書

章臺猶旅食珍重故人書自是飄零久非關記憶疎野  
花紅更發官柳綠仍舒浩蕩乾坤意吾生總不如

馮時可

七首

時可字敏卿松江華亭人隆慶辛未進士除刑  
部主事改兵部歷負外郎中出為貴州提學副  
使再補四川提學副使調廣西湖廣叅政有北  
征西征金閭石湖巖棲雨航等集

陳卧子云吾  
鄉元成可方

吳門劉

子威

詩話元成詩極為後來詩人所詆就全集而觀  
甫田彌望狼莠汙萊獨五古一體尚有遺秉滯  
穗可供招拾以比  
劉子威翻覺勝之

齋居雜述

二首

兔狡能營窟鳩拙亦居巢兕虎入帝苑麒麟走空郊玉  
石貌難分金錫質易淆三黜不必愚九遷豈必豪屈伸  
由好惡人生在所遭鴻也費歌噫雄也費解嘲何如與  
化遊小大並逍遙

白龍下清淵漁者射其目白龜使清江卜者剝其腹元  
君違神夢上帝惡魚服風波一失所雲雨迷牽復芳艸  
化為芻苦菜蘊為蓄世事如轉蓬人情多反覆冉冉百  
年中愁居何能淑

戊戌歸田雜感 二首

箕斗不共垣有采相為光蘭蕙不共根有氣相為芳奈  
何同居者各自生肺腸一笑亦見疑片語含鍼鉞不能  
相慰勞安望相頡頏長林知天風大埜知天霜人生不

相知何用接杯觴

北風何其涼霜霰相與期薄暮侵衆卉芳鮮漸已辭玄  
髮不堪秋忽覺變青絲翩翩飛蓬征愴愴遊子思浮雲  
一出山安知其所之故交皆已貴故心誰為持酌水置  
金壘為辨澠與淄

送張孝豐

浮雲不可駐遊子不能留驚飈逐駭駟歲月去何遒  
寒安得裘濟河安得舟客處無與懼寧不思故丘

常山道中遇雨

東山詠零雨感彼歸途事  
今茲賦愁霖行役我伊始  
霖霏業不堪滂沱末由止  
嶄嶄山彌高油油雲未已  
我車淖方掀我僕顛莫起  
蛸蛸蠋蒸桑肅肅鵠集枳  
苦哉遠征人重山復重水

建陽道中

趨程苦行遲遇景苦行速  
清晨發建陽重霧若雲簇  
載馳且一舍始能豁我目  
清溪映明沙茂樹間修竹  
千山



開且合煙翠爭相逐飛梁若垂虹去艇如遊鷺竟日抵  
甌寧應接難更僕人遠意如何良遊偏恨獨

方揚一首

揚字思善歙人隆慶辛未進士歷官杭州知府  
有初菴稟

金山

虛閣疑無地琳宮別有天江空萬籟發僧定一燈懸七  
澤吞吳楚孤峰自歲年乘風興不淺高眺已冷然

劉伯淵 一首

伯淵字靜之號念庭慈谿人隆慶辛未進士除  
泰興知縣遷工部主事歷貢外郎中出為江西  
按察副使以病致仕歸年百餘歲卒有灌息亭  
集

詩話念庭於隆慶五年釋褐萬歷十六年即引  
疾歸其八十初度自嘲詩云謂我歸田早假令  
不早有何好幾人欲歸不得歸黃犬東門添懊  
惱謂合彈冠出陶令折腰八十日投閒已道宜  
休三揣分真成不堪七及百歲思陵遣御史梁  
雲構存問念庭猶健步迎於門外謝恩畢騰觚

飛爵了無倦容崇禎十一年事也吳興有顯者  
家居以厚幣乞言介壽念庭笑曰七十上壽母  
乃太早乎浙東西  
相傳以為佳話云

園居

松際茅簷隔小橋水濱穿圃亦通潮得閒獨坐翻書卷  
有客相過慰寂寥方竹歲深栽作杖大壺霜落剖為瓢  
年豐飽喫青精飯莫問仙山路近遙

吳丕顯

一首

丕顯字希文松江華亭人隆慶丁卯舉人承天

府通判有四留軒集

詩話希文奕葉青門一官散吏庶能著聞相傳  
初補學官弟子製青苧為襴衫授兄子太僕  
炯以及孫曾家有青苧亭至今存焉襴衫之製  
諸生服之洪武二十四年三易其式而後定用  
玉色絹布為之寬袖皂緣繫緜垂  
襦其後漸易以藍罕用布者矣

題襟江樓

纜解春江曉帆懸碧樹秋開窗千里月近檻一江流草  
色迎芳渡歌聲逐去舟十年湖海夢猶自媿沙鷗

鄭學淳一首

學醇廣州順德人隆慶丁卯舉人選授知縣有  
勾漏州

園居


藥裏供垂老幽棲性獨偏每尋高士傳無復遠遊篇  
柔櫓村煙外寒江夕照前沙鷗我與汝相對可忘年

梁岳一首

岳廣州順德人隆慶庚午舉人官知州

暮春燕京懷歸

長安春盡落花多  
越客思歸意若何  
節序幾從愁裏變  
家園頻向夢中過  
西京形勝雄三輔  
北鴈音書隔九河  
燕市酒壚堪取醉  
莫將留滯起悲歌



明詩綜卷五十六

欽定四庫全書

集部

明詩綜卷五十八

詳校官中書

臣涂日煥

主事銜

臣徐以坤覆勘

總校官降調編修

臣

倉聖脉

校對官庶吉士

臣

潘曾起

謄錄監生

臣

楊

恪



欽定四庫全書

明詩綜卷五十七

翰林院檢討朱彝尊編

李應徵

三十首

應徵初名衷毅字伯遠嘉興人萬曆癸酉舉人  
選授臨安教諭陞南國子博士有青蓮館澄遠  
堂偶寄軒藿園寄茗薊易河梁兩都汗漫遊諸

集

皇甫子循云伯遠肆力風雅律詩時似少陵  
而風骨師心太白

彭子殷云伯遠詩頓挫

激昂跌宕 飛舞若鞭赤虬轡蒼螭而上下彩虹  
碧落之間 鄧遠遊云伯遠意取師心法必摹  
古其于諸體無所不工亦靡所不合 黃貞父  
云伯遠詩雄沉俊爽如驃騎之師不設刁斗而  
肅然不可犯 鍾漢廣云先生早察孝廉以才  
望自高既艱于一第老就四門博士其詩取材  
開竇匠法弘正是時七子之習變為叫呶公安  
之派漸已淫永先生激彼頽波力返正始閑麗  
悲壯卓然成家

靜志居詩話 弇州標榜前後五子而外廣  
為四十子若似乎此外無遺賢矣說詩者  
遇隆萬朝士或置不觀直以公安景陵繼  
七子之派不知隆慶諸臣已力挽叫囂  
之習歸于平澹而定陵初年人皆修辭琢句出  
入風雅之林若吾鄉李先生伯遠若下鄭先生

允升吳中歸先生季思嶺南區先生用孺尤卓  
然名家而閩中徐惟和謝在杭曹能始均不為  
楚咻所奪未見萬厯初之不及嘉靖季也  
學者取諸家詩誦之庶幾論世有權衡矣

吳門逢袁履善先生却贈

涼風起蘋末落日開中園寒蟬聲嚶嚶飛鳥何翻翻顧  
逢雲間叟而同江上言我昔與君別遠涉長水原今日  
復見君乃在吳閭門閭門鬱雲興流焱激飛軒攜手登  
茲樓時以散憂煩明月皎夜光有酒盈我尊開尊飲君  
酒寸心聊復論丈夫重意氣迹遠道自存何必齊年齒

然後情誼敦願將結佩贈愧無雙瑜璫

八月十四夜赴沈中丞純甫約與范倩東生泛月  
之茗上

顏照忽已匿閒夜增離情涼風扇薄帷白露塗中庭詠  
彼蟋蟀唱眷言懷友朋佳期及三五圓景將漸生素書  
忽見招方舟驚前汀薄煙斂層霄皎月雲間升驚鵲既  
飛遶來鴻亦哀鳴流輝照衣裳坐見秋江澄爽氣蕩瀾  
澳沖魄涵虛明屬林方候滿委照知戒盈且勿論居諸

杯酒聊共傾芳洲思紉蘭極浦聞采菱不寐望所歡悠然見菰城良覲在明發庶以慰深盟

寄御史大夫沈公純甫

誰謂芝桂芳指作施與猶誰謂西施妍而不如宿瘤姬公避流言孔父蒙靡裘鳳德故不衰仁物竟奚尤睿鏡有餘照慈杼無妄投亮懷百鍊操繞指非所謀勿以入室故競彼戈與矛讒口任呶呶鎮之以休休泰山摩蒼天不辭埴與丘滄海百谷王涓勺鮮棄流桃李故不私

藥籠亦見收交親誼所敦申言副咨諏

題清音閣贈朱君采

君采天下彥乘時奮遼廓身雖在軒冕志不忘巖壑朝  
謝桓氏驄暮羅翟公雀結樓臨青苔憺焉守玄漠一水  
既當戶衆山亦羅郭俯瞰激清泠仰熙矚崖峒曠然招  
遠風蕭疎振林薄并入山水間情境兩寂莫綠尊時時  
開清言復閒作心期契鴻冥世變付龍蠖達人操其權  
神理或可託

秋夜歸自苕水泛月鶯脰湖寄沈子勺

朝辭若下城暮驅笠澤舫景物忽已改川原亦邈緬娛  
目惟清暉百里同一昶月出梅堰高水落松陵淺曲渚  
屢縈紆環洲逶迤轉澹澹波生煙遙遙雲沒峴楓林霜  
欲丹蒹葭露初泣境會心自恬神曠理逾顯同懷寄秋  
水離念得所遣

述感

旭日不照地慘黯東南隅陰風西北來遂與浮雲俱昏

曉不復辨晦冥忽須臾雷霆擊高空雨雹集階除皇澤  
亮已竭天威寧所須戾霄無逸飛逝淵寡潛魚貂璫構  
禍患豺虎當路衢宇宙雖云遙吾駕將安如

武夷吟為叔平姪賦

浙水猶未渡閩山安可越夜夢武夷君幔亭弄秋月顧  
余莞爾笑相攜叩丹闕薜荔飄衣裙芙蓉墮冠髮吹愁  
落空際步虛任超忽陡覺聞天雞明星高兀兀九曲杳  
然失對汝清興發安能涉世網生死遞淪沒何當乘飛



霞揮手謝仙骨

舟過松陵沈子勺邀同顧別駕王半刺諸公宴集  
作兼呈長公伯英

扁舟遡廣澤蒹葭浩蒼蒼芙蓉被江隄間以秋蘭芳恍  
如覲容儀眈眈舒其光美人忽見招忝竊登斯堂余遊  
伯仲間常恐不得當匪云託肺腑所恃道誼長市交若  
春華改葉隨秋霜苟能抱微衷乖離亦何傷所以一水  
間落穆如相忘豈謂山澤臞無意偕巖廊跡遠心不遐

斯意兩不妨樂哉此良會周親情所康看來俱異味酒  
至無返觴新聲奏逸響妙伎呈中央主人詞壇雄樂府  
兼擅場曲誤必屢顧按節知宮商此中有妙理奚必非  
文章世多混真贗誰別否與臧吾將託優孟抵掌以徜徉

雜詩 二首

所居雖廛市其後即我園三周水繞之水流何潺湲灌  
木既羅戶密篠亦當軒境近心獨遠悠然忘世喧夜枕

鳴谿漁曉窗聞鳥言病不廢杯酒時時亦開尊適意不  
在醉聊託餘生存

人生歡日少戚戚恒多悲每憂此身沒身後無所遺所  
以百年中役役無已時生時不行樂死復安所知墳墓  
且不保智愚豈所期及此有盡軀壺觴聊自持秋雨日  
以深秋草日以滋巖霜倏將至不樂欲何為

長水雨中送董君謨還四明

谿雲壓林林氣黑長河黯淡無顏色大扁驅來笠澤風

一片歸帆雨中濕送君此去歸舊山東湖之水流潺湲  
四明崇峯二百八一一峯尖如黛髮董生瀟灑磊落之  
才亦如此對之可以開神顏我歌四明送君酒何惜相  
逢暫攜手便應喚汝董糟丘酒池之中可拍浮盡掃爾  
我坎坷抑塞之窮愁丈夫意氣自有主為蛇為龍何足  
數無錢但須典鷓鴣有酒便能賦鸚鵡少年得意多擲  
揄却笑乃公爾何苦仰天大叫白日徂腐鼠那可驚鷄  
雛男兒世間何事不可作但不能以此七尺為侏儒功

名富貴可以赤手博摧眉俛首胡為乎世人聞之皆掩  
耳董生之前可語此酒闌歌罷君發船我亦還家渡長  
水

歷陽

聖祖開基日淮南即舊邦六龍飛采石萬馬渡橫江豪  
傑爭挑戰轅門已受降雲山凝望處髣髴見旌旂

項王廟

落日陰陵道悲風百戰原當年意氣盡四面楚歌喧子

弟軍誰在春秋廟獨存江亭艤船處悽惻不堪論

橫江

日落海雲起蒼茫倚棹看橫江不可渡秋水正漫漫夾  
岸青山出孤飛白鷺寒當歌有明月對酒莫辭乾

江行與蘇生別

葭莢正蒼蒼綠流水一方平沙連極浦斜日上危檣坐  
惜故人別因悲江路長行行秣陵近回首各他鄉

人日峴山遣興

人日人為客春風春可憐煙波浮宅遠丘壑寄情偏  
柏葉烏程酒椒盤下若鰯如從習池飲醉卧岷山前

正月十六夜畢孟侯至

春草忽已綠春潮寒到門喜從新雨後得共故人言  
小婦調中饋殘燈續上元庭梅未搖落還擬數開尊

送沈嘉則之天台訪道士

秋水看疑合秋聲聽不分此時四明客去謁三茅君  
洞壑深藏日峯巒盡入雲蒼茫煙樹裏笙簫幾回聞

廣陵送張孟奇

乾坤同作客千里任飄蓬  
沉復離亭別蕭條落照中  
濤聲揚子北寒色海門東  
去去煙波外無為歎路窮

送萬和甫歸里

亦知非遠別還復念孤征  
行色江天樹歸帆水國程  
北風吹斷雁九月豫章城  
到日深愁汝淒其倦客情

聞王師東援朝鮮

材官十萬欲平倭  
司馬何如漢伏波  
殺氣曉連玄兔郡



將軍夜渡白狼河還須直破伊岐島莫使虛傳杖杜歌  
禮樂東藩箕子國王師急為洗干戈

釜山紀事

西來邊警日倉皇東望烽煙漲海黃持節不煩蘇屬國  
和戎誤聽漢中行遂令綸綍虛丹鳳翻引旌旗指玉狼  
莫道朝鮮猶未靖急將本算慎朝堂

送康元龍還閩時歸自海上

書生尊俎笑談兵幕府還聞倒屣迎九塞昔曾驅馬度

五湖今許放舟行  
海天雲樹無諸國  
客館鶯花樵李城  
莫道倦遊歸計拙  
春風應念倚門情

重送萬和甫還江西

去歲今年兩度回  
寸心遙指白雲隈  
城頭擊鼓天未曙  
江口候潮船正開  
望望美人南國遠  
淒淒孤雁朔風哀  
明朝此地看山色  
愁絕還登百尺臺

春懷

衡門過雨淨疎簾  
愁對春江淚共添  
萬戶耰鋤連海岱

三苗戈甲遍已黔和戎自詫長城險御馬誰知朽索纖  
杞國憂懷殊不細起看林月步虛檐

舟中眺雪

俯仰迷江甸東南凍未蘇扁舟下遠水積雪斷寒蕪朔  
氣連滄海窮陰混太湖瀟瀟兼霰密脉脉受風扶大地  
遙浮越低空近壓吳山川紛莽蒼雲木半虛無雁路纔  
分影鷗沙祇辨呼戢鱗潛素鯉側目逗饑鳥色借齊宮  
並音操郢曲孤披來朝練淨映處夜珠枯不用裁梁賦

偏宜入剡圖乍驚容鬢似却怪歲華徂臘漸回杓斗春  
先到酒壚乾坤原浩蕩泥滓暫崎嶇自笑寒暄態誰燃  
造化鑪聖朝陽德在白日麗高衢

浪口渡

柳風吹浪花谿雲澹無色偶此爭渡人日夕未遑息

煙霞洞

古洞鴉路深杳渺不知處忽見煙雲來疑從此中去

館娃宮

不嗟亡國餘而憐奇豔絕翻得捧心人吳宮名未滅

十八夜宿煙雨樓初見月

雨氣連朝夕湖雲濕未收今宵看月色始覺過中秋

姚舜牧 一首

舜牧字虞佐烏程人萬曆癸酉舉人廣昌知縣

有承菴詩集

詩話承菴以厚德聞鄉里事難悉書研  
究六經各有疑問詩不專工然頗自喜

自君之出矣

自君之出矣，守深閨，裏花落，委泥中。誓不隨流水。

林章

十七首

章先名春元，字初文，福清人。萬歷癸酉舉於鄉。

有林孝廉集

謝在杭云：孝廉桀驁不羈，才情楚楚，信自可人。曹能始云：初文才

士不欲以庸孝廉是處，好為人排難解紛，乃以無心獲罪，謝司寇出之縲絏之中，適遼海有警，累上書進奇策，願身列戎行，錄甲兵，備緩急。為嫉者所繩，觸憲而死。詩如：客情如春草，無處不堪生。無家逢寺好，多病見僧親。曉煙常帶雨，夜月忽啼禽。千山風雨裏，一任子規啼。皆絕酸楚。

周元亮云：初

文才情悽惋。

少年行

君不見長安俠少年酒底高歌花底眠  
關雞走馬千金散何曾盜箇官家錢  
一朝忽報邊烽起從軍不待別妻子  
但言割地與和親不愁戰死愁羞死

春日送別

春風自多思奈與客情違楊柳頻催別  
蘼蕪不送歸千山獨上馬一曲兩沾衣  
回首河橋道迢迢看落暉

吐漿臺弔淮南王英公

孤祠千載後不是漢人開  
劉項俱天意韓彭只將才  
九江殘水過六國故山迴  
惟有啼鴉在黃昏下此臺

舟中別張仲豫

昨日淮陽客今朝江上還  
離亭一杯酒去棹萬重山  
雲樹故人意風塵游子顏  
未知攜手處莫惜暫追攀

暮春登燕子磯懷古

揚子江南燕子磯  
楊花燕子一時飛  
六朝人物空流水  
兩晉山川盡落暉  
草色遠迷瓜步去  
潮聲暗打石頭歸



倚闌天際春三月惆悵東風動客衣

陳漢陽同年招飲晴川閣應城田功甫孝廉適攜  
酒至余於功甫為初識而別漢陽則十年矣時當  
七夕書以記之

木葉西風漢渚波高樓徙倚晚涼多十年易作人間別  
七夕難為客裏過陳子榻前堪對酒田郎座上好彈歌  
孤城漏下雙星見牛女娟娟正渡河

郢城見黃序賓使君

雲雨交情此日偏與君相見可潛然豈無太守二千石  
那有故人三十年冠為王陽彈不忝袍因范叔脫堪憐  
舊時一片灤城月何似今宵漢水前

潛山送友還閩

草草相逢楚澤西紅亭綠酒又分攜人生底事憐雞肋  
客路長教怨馬蹄舒子州前檉葉暗越王城外荔枝齊  
十年歸夢如流水一夜隨君下建溪

送別

相送到江干，淒其風又雨。淚下沾君衣，看君不能語。

夜度恨這關

楚水東邊別路多，秋風夜半動離歌。迢迢恨這關前月，獨照行人過汴河。

河水 二首

河水灣灣遠大隄，隄邊楊柳一時齊。可憐折盡青青色，長送行人出水西。

河水漫漫日夕流，流將清恨到青州。不知郎在青州不

妾在河西西盡頭

豔曲

百花臺上百花開  
妬柳驕桃一處栽  
惟有東風情最好  
桃邊吹過柳邊來

憶仲姬

逢時把酒對紅顏  
親為拈花插翠鬟  
今日登高人萬里  
教伊獨上望夫山

春日

春城柳色入東華  
莫惜驂驢過酒家  
記得去年江上別  
風吹二十四橋花

渡江

不趁東風不待潮  
渡江十里九停橈  
不知今夜秦淮水  
送到揚州第幾橋

元旦

千官春珮擁朝班  
萬國歡聲動聖顏  
獨有縈臣無祝處  
隔牆遙拜孝陵山

孫繼皋 六首

繼皋字以德無錫人萬曆甲戌賜進士第一歷  
官吏部左侍郎有柏潭集

山中

山中無棟宇小屋但誅茅境僻人煙少林深虎迹交暗  
泉通石竇炎日避松梢寂寞元吾事披襟誦解嘲

立秋日病

伏枕仍今夕開軒乍已秋高梧片葉落大火一星流楚

戶砧初動齊紈扇欲收因思故園鱸強起賦登樓

彗

十月彗星見一旬光丈餘銀河不用掃天意欲何如避  
殿君王詔登臺太史書杞人憂國淚占夜幾踟躕

送周計部餉邊

大漠平連薊北天向來前箸急籌邊將軍已佩通侯印  
使者仍輸太府錢幾處鼓鼙閒落日何年烽火避甘泉  
君行會有匡時畧試問金城塞下田

丙子春夢得一聯足成一絕

落日船頭浪春風江上山家園幾千里却向夢中還

芙蓉湖

芙蓉湖邊楊柳斜家家啼鳥村村花水面歌兒搖畫舫  
陌頭游女渡香車

余孟麟

一首

孟麟字伯祥江寧人萬曆甲戌賜進士第二歷  
官南京國子監祭酒有幼峯學士集



多病

多病門常掩深秋葉盡飛自憐初學廢遂覺故人稀  
鑷白心虛壯還丹計實非不堪風露色猶著芟荷衣

孫

鑷

二首

鑷字文融餘姚人萬厯甲戌進士歷官太子太  
保南京兵部尚書有居業編

詩話月峯勤學過於士安慧業不如靈運觀其  
論詩有云韓退之於詩本無所解宋人目為大  
家直是勢利他爾是何言與尸佼所云  
松柏之鼠不知堂密之有美樵者也

雨

漠漠雲籠閣霏霏雨拂簷彈琴絃半緩收扇墨多黏古  
礎方花潤高枝墜果甜此心無俗慮屋漏亦何嫌

舟行

天陰村逕黑渾迷舊時路忽逢岸上燈照見橋邊樹

趙南星 八首

南星字拱極高邑人萬曆甲戌進士除汝寧推  
官入為戶部主事改吏部歷員外郎中謫平定

州判官起太常寺卿尋陞工部侍郎拜都察院  
左都御史進吏部尚書謫戍代州卒謚忠毅有

趙忠毅公集

姚益長云夢白詩淋漓沉痛  
讀之如聞易水擊筑之音

雜詩

騎馬出城門攬轡登高岡秋風凋百草原野何荒涼離  
獸縱橫馳饑鳥鳴且翔四望多古墳蕭蕭蔭白楊結根  
連枯骨落葉滿墓傍泉室永寂寞無復白日光今古更  
相悲奄忽若朝霜髑髏樂南面無乃非其常修名苦不

立死亦何足傷

宿雨

宿雨苦不開四望垂雲黑塗潦浩縱橫阡陌不可識客  
子駕言邁行行還自惻薄暮路轉修人馬同倦極高空  
絕飛鳥沉我無羽翼遠壑來悲風草木慘無色念彼白  
駒詩喟馬長歎息

聞陳荆山方伯病免

解組亦常言斯人何其果纔見北來鴻俄聞南下舸故

人俱還山酒錢誰寄我嗟彼四海人何限不舉火拯物  
豈不懷仕路方坎坷同心眇天末難鼓山陰柁酌我犀

角杯遙思澆磊砢

余曾寄荆  
山犀杯

壬子仲春與梁升吉徐新周汪景從吳昌期及其  
子貞復遊涕上取水烹茶

命侶遊南郊乃至涕之干春風澹未放薄衣尚微寒水  
落出平沙中為新月灣抽蒲此偶坐西睇太行山淺流  
開明鏡綺波生其間童子負茶鼎烹之瑩心顏自有涕

水來勝事良絕難俗人既無韻雅人未必閒我輩幸免  
俗世務不相關濁河衆魚噉夙志非投竿

庚戌立夏日

早氣翻涼冷司方改祝融家家田望雨日日土兼風轉  
壑非能盜開倉未濟窮已知天意久不肯遽年豐

燕子

漸見年來燕子稀香泥何處戀忘歸竹亭草閣簾虛卷  
樹杪雲邊影乍飛社日屢看時節爽舊巢忍與主人違

蕭條景物殊疇昔歎息林中事亦非

寄父卿

懸瓠城頭坐日斜  
目隨鴻雁極天涯  
祁連風卷沙如霧  
瀚海春飛雪作花  
擊筑可憐燕市月  
鑿空虛擬漢臣槎  
已拚萬死投荒塞  
豈望金雞更憶家

寄象先兵部

長安歲晚雪霜頻  
林下應知忘故人  
此日音書那不寄  
銀魚冬筍未嘗新

李三才

六首

三才字道夫臨潼人萬厯甲戌進士除戶部主事歷員外郎中謫東昌推官陞南禮部主事轉郎中出為山東按察僉事歷河南參議副使調山西入為大理少卿擢右僉都御史督漕運拜戶部尚書有雙鶴軒鷓鴣軒二集

秋夜宿直

十載猶郎署蹉跎媿少年涼風迴樹杪白露下庭前漏



度三更雨燈殘五夜煙由來飛動意回首欲茫然

送許郎中轉餉荊密諸鎮

重鎮經行遠清秋離別難議和兼漢策轉餉命秦官朔  
雁驚風下邊雲入夜寒都亭尊酒罷落葉滿征鞍

送姜仲文之徐州

轉餉君之楚為郎我滯燕一尊悲遠道並馬憶朝天雲  
失西山樹江迷大澤煙相思若汴水日夜咽君前

送馬心易被謫南還

風雨金陵暮蕭然逐客舟酬恩空一劍去國正三秋岸  
濶清風遠江深落照愁五湖知有興只此又何求

送諸博士壽賢量移過里兼懷顧叔時兄弟

秦關西望壯心驚風雪梁園送汝行漢帝有恩前賈席  
書生何計請終纓金縢歲月方挑釁宵旰朝廷已論兵  
若到江南逢二顧安危萬里想同情

謝杰 二首

杰字漢甫長樂人萬曆甲戌進士除行人歷官

戶部尚書有北窗吟藁

煌煌京洛行

煌煌京洛維帝之鄉地交陸海人雜五方物態千狀靡  
可籌量炙手可熱死灰或颺清商回換六月飛霜翟公  
門第雀羅倏張衛青僣僕夕拜侯王黃金作埒白玉為  
堂東鄰施戟北里鳴璫郭杜惡少邯鄲名倡徵歌百萬  
縱博千場時不可再樂不可常悠悠南陌纍纍北印東  
望上蔡西望咸陽黃犬既斃狡兔亦僵有德以昌無德

以亡周公之訓懔如探湯

死馬行

月月橋門進草束千束萬束猶不足朝朝死馬出橋門  
五匹十匹紛相屬馬草日進馬日饑馬饑日死人日肥  
圉人圉人馬用爾輩為草人上草將錢買屠夫領馬作  
肉賣賣馬肉輸圉人馬死何能值幾緡有時草人轉向  
圉人買得死馬草明朝又進橋門道

呂坤 三首

坤字叔簡寧陵人萬曆甲戌進士知襄垣大同  
二縣為吏部主事歷員外郎中出參政山東按  
察山西轉陝西右布政以右僉都御史巡撫山  
東陞刑部侍郎有去偽齋集

雜詩 二首

野水漸我車掀之出于淖夫豈避危途行險終違道萬  
事有當然禍福安足保君子守其轍無論遲與早孔孟  
恒固窮儀秦毋乃躁所得非所欲寧以落魄老

土偶象為人終復化為土物化還吾初此身了無苦自  
予落蓐時覺饑寒痛楚不幸漸有知六氣滋外侮逆境  
不須論快事奚予補勞勞空百年孰注南宮簿

別意

留妾一身在憐君萬里行夜來雙泪盡不忍到長亭

徐元春

一首

元春字正夫松江華亭人萬曆甲戌進士歷官

太僕寺卿

靈谷寺訪月泉禪師

山郭尋僧出行行黃葉邊石泉秋聽急江月坐來圓興  
豁長昏夜門開不住天時聞鐘磬發獨立萬峯前

楊四知 一首

四知字元述祥符人萬厯甲戌進士除行人擢  
陝西道御史歷大理寺少卿

高玄殿

高玄宮殿五雲橫先帝祈靈禮太清鳳輦不來鐘鼓靜

月明童子自吹笙

邢侗

四首

侗字子愿臨邑人萬曆甲戌進士除南宮知縣徵授監察御史出為湖廣參議陞陝西行太僕

少卿有來禽館集

史紹卿云先生能大能詩能書能畫最會諸長擅絕兼品

詩話子愿雖有詩名為書法所掩其言曰詩盛于嘉隆七子以為盡詞人之變矣然效趨者高趾促柱者急張往往不病而呻吟匪樂而強笑江河日下七子之盛七子之衰也蓋深中時流之弊特其自撰不見脫穎耳



竹馬歌為濟南太守樵李沈公作

使君五馬馬五色兒童竹馬馬以百朝朝遲公阡與陌  
胡為不夙來令我父兄頭漸白

起居宗伯尊師于公

七上書移疾三經月改弦臣心霜露切帝命起居駢去  
住違今日遲回易長年獨餘秋夕夢常繞汶陽田

走筆戲贈萬伯修使君

五花番馬鷓鴣裘夜獵歸來興未休教唱西涼新樂府

一時霜月遍幽州

古意再寄于田

零落鈿蟬出漢宮  
闌干雙淚背春風  
君王總署迴心院  
再畫蛾眉恐未工

周弘禴 一首

弘禴字元孚麻城人萬曆甲戌進士除戶部主事謫無為州同知陞順天通判復謫代州判官遷處州府推官轉南兵部主事歷尚寶司丞進

少卿三黜為澄海典史有澄海集

乙酉貶代州壬辰貶澄海俱旅宿高碑店

風塵何處問銜盃南海浮槎更可哀古道垂楊應笑客  
逐臣何事又重來

游

朴

三首

朴字太初福寧州人萬曆甲戌進士除成都推  
官入為大理評事官至湖廣右布政使有藏山  
集

行役

驅馬上高山山高欲近天及到山巔上更有山在前高  
山豈有盡客行良可憐

木綿菴

淒淒木綿菴賈相此裂腹矯矯鄭虎臣手代天行戮戮  
死頗快人所恨死不速元兇僅就誅宋社亦已屋蒼生  
尚含憤未得食其肉一夫恣宵臆九有被荼毒生竊片  
時歡死作千世辱寄語當路兒此是前車覆

崇寧縣却酒

崇寧清酒如鬱金主人長跪留客斟客行欲飲迫程限  
不飲傷此主人春風爛熳遍山壑把酒澆花殊不惡  
客還有酒應留連只恐山花已零落

范涑一首

涑字原易休寧人萬厯甲戌進士除城南知縣  
入為刑部主事厯官左布政使有水堂吟

浣花溪

百花潭接浣花溪  
饒笑堂開傍水西  
新綻夭桃帶微雨  
輕飛柳絮半沾泥  
尋芳力倦年非壯  
懷古愁多日欲低  
回首白雲家萬里  
深林偏喜杜鵑啼

沈

璟二首

璟字伯英吳江人萬厯甲戌進士官光祿寺丞  
擬古答澤民

客從遠方來遺我一紉扇  
上有秋風詞讀之淚如霰  
颯颯懷袖間悠悠異鄉縣  
會面詎有期涼燠代更變  
莫以

新相知棄捐故與賤

酬澤民見懷之作

何來雙鯉漢江頭  
江水西南萬里流  
高枕青山家負郭  
開襟白日賦登樓  
洞庭葉下孤雲晚  
夢澤寒深五月秋  
珍重芳蘭堪作珮  
湘皋搖落不須求

陶允宜 六首

允宜字懋中會稽人萬曆甲戌進士除刑部主事官止黃州府同知有鏡心堂集

蕪簟

簟出蕪州世所無五月六月繩牀鋪恍坐水閣眠冰壺  
皇都炎熱逾江湖貴臣催簟如催租民情誰語州大夫

蕪父

七年之病三年父起死回生人所賴芄芄白葉功為最  
麒麟山上王城在索取其中却其外出入頗煩閭者怪  
何時斷種出野菜火病華痕兩無害

蕪蛇



花蛇方頂尾甲指捕者剖腹投之水自脫腹胃淨如洗  
大如竹箭長尺咫能却風攣化食瘡方其出穴疾如駛  
偶遭毒吻人立死我節食飲慎眠起諸邪不侵病良已

### 蘄龜

千年龜小象圍棋其甲翠綠毛毳毳置之盆水生漣漪  
蚊蠅遠避塵自離壁頭牀足兒曹嬉不飲不食長如斯  
求之艱難誰得之

### 麻城鵝

麻城鵝品光州右餌以膏粱兼菜豆肉色紅鮮滋味厚  
取之為鮓進元后近年黃州失耕耨一鵝之肥幾人瘦

黃陂葛

楚人種葛不種麻男採女績爭紛挐黃陂所織尤精嘉  
光潔勻細眼不斜皎如白苧輕如紗進之內宮傳相誇  
雲綃霧縠無光華價值減少尺幅加織者十家逃九家

支大綸一首

大綸字心易嘉善人萬歷甲戌進士由南昌府

學教授陞泉州府推官謫江西布政司理問遷  
知奉新縣有華萃集

信州公署

玉露楓林旅雁寒綠蕉分影入雕闌自憐兩度來江右  
不是閒官即冷官

韓子祁

一首

子祁字心堯平湖人萬厯丙子順天鄉試中式  
除德安推官補贛州歷蘇州府同知有醢雞集

煙雨樓

層樓百尺點空濛東指蓬壺一葦通  
春雨自添湖上碧晚煙輕抹浪頭紅  
萬家煙火浮天外午夜星辰落鏡中  
醉坐漁磯還獨酌却將鴛渚作鰲宮

龐一德 一首

一德字與虔南海人知府嵩子萬厯丙子舉人  
嘉魚知縣教授揚州有雙瀑堂橐

山家

入山亦已深居人一何稀  
百里三四家茅茨枕山陂  
麋斫山木葉餉食道邊藜  
斜日羣行汲漏下未得歸  
籬門麕眼疎所憂虎與羆  
居人已偃卧何由知客悲

明詩綜卷五十七